

**BOSNA I HERCEGOVINA  
FEDERACIJA BOSNE I HERCEGOVINE  
JU "KANTONALNI CENTAR ZA SOCIJALNI RAD"  
SARAJEVO**

**PROGRAM RADA  
JU "KANTONALNI CENTAR ZA SOCIJALNI RAD"  
ZA 2023. GODINU**

**Sarajevo, april, 2023. godine**

# I UVODNI DIO

Na osnovu člana 27. stav 1. alineja 4. Zakona o ustanovama („Službeni list RBiH“, broj 6/92, 8/93 i 13/94) i člana 30. stav 1. alineja 6. Pravila JU „Kantonalni centar za socijalni rad“, Upravni odbor je na 23. sjednici održanoj dana 14.04.2023. godine, utvrdio:

## **PROGRAM RADA JU „KANTONALNI CENTAR ZA SOCIJALNI RAD“ ZA 2023. GODINU**

### **1. Ciljevi JU „Kantonalni centar za socijalni rad“ u 2023. godini**

JU „Kantonalni centar za socijalni rad“ (u daljem tekstu Centar), putem nadležnih Službi socijalne zaštite, planira u narednoj godini da građanima Kantona Sarajevo, koji se nađu u stanju socijalne potrebe pruži neposrednu socijalnu pomoć/zaštitu. Također, Centar kao organ starateljstva će, u okviru svojih nadležnosti koje proizilaze iz važećih materijalnih propisa, raditi na pružanju mjera i usluga porodično-pravne zaštite, te raditi na provođenju mjera i usluga maloljetnicima koji su u sukobu sa zakonom i njihovim porodicama. U svakom navedenom segmentu svoje aktivnosti će usmjeravati u pravcu postizanja i očuvanja najboljeg interesa svakog djeteta.

Prije svega, kao i u dosadašnjem radu, Centar će obavljati svoje redovne poslove, te izvršavati zakonom utvrđene obaveze, nastojati unaprijediti kvalitet svog rada, prateći razvoj nauke i savremenih metoda, te će nastojati isto primjeniti u svojoj praksi, a u okviru svojih mogućnosti i u skladu s istim nastojati da organizuje aktivnosti koje su od preventivnog značaja za oblast porodične i socijalne zaštite.

Kroz svoj rad i djelovanje u zajednici u skladu sa mogućnostima i raspoloživim sredstvima, Centar će nastojati da omogući, kako socijalnu, tako i porodičnu zaštitu osobama kojima je ista najpotrebnija, te da svojim aktivnostima i stručnim radom poboljša položaj najugroženijih kategorija stanovništva.

JU „Kantonalni centar za socijalni rad“, usljed priliva većeg broja migranata u BiH, se uključuje u pružanje pomoći djeci migrantima, izbjeglicama, azilantima I djeci bez pratnje ili djeci odvojenoj od roditelja ili staratelja, u skladu sa nadležnostima za pružanje porodično-pravne zaštite, dječije zaštite, socijalne zaštite I zaštite porodice od nasilja I maloljetničke delinkvencije, a sve u skladu sa zakonima koje Centar provodi. I u toku 2023. godine očekuje se kontinuiran rad sa ovom kategorijom korisnika, jer se Prihvatni centar „Ušivak“ nalazi na području općine Hadžići. Također, na području općine Ilidža, nalazi se I Prihvatni centar „Blažuj“, gdje su smješteni migranti I izbjeglice, ali se radi o punoljetnim licima, te će Centar sa istim postupati u skladu sa svojim nadležnostima.

Centar će građanima Kantona Sarajevo, pružati informacije o pravima koja mogu ostvariti iz oblasti socijalne i porodične zaštite, putem službi socijalne zaštite općina, a kroz sredstva javnog informisanja, putem pisane štampe, radija, televizije, društvenih mreža, web portala, promocija i javnih gostovanja, kao i kroz saradnju sa drugim ustanovama socijalne zaštite i drugim institucijama.

Također, zaposlenici će svojim djelovanjem na terenu kroz: rad u mjesnim zajednicama, porodičnim ambulancama, centrima za mentalno zdravlje, saradnjom sa školama, opštinama, udruženjima, nevladinim organizacijama, i drugim javnim ustanovama, prikupljati informacije o osobama koje se, iz zdravstvenih ili nekih drugih razloga, nisu u mogućnosti obratiti za pomoć Centru, te na temelju prikupljenih informacija poduzimati odgovarajuće aktivnosti u cilju njihove zaštite, a koje su u nadležnosti Centra.